

0 1 2 3 4 5 6 7 8 9 10 11 12 13 14 15 16 17 18 19 20

0 1 2 3 4 5 6 7 8 9 10 11 12 13 14 15 16 17 18 19 20

故唐律疏義

和裝本

74

2503

5

7保4
門號 2.503
卷八



故唐律疏議卷第七

衛禁 凡一十八條

疏議曰。衛禁律者。秦漢及魏未有此篇。晉太宰賈充等酌漢魏之律。隨事增損。創制此篇。名爲宮衛律。自宋洎于後周。此名並無所改。至於北齊。將關禁附之。更名禁衛律。隋開皇改爲衛禁律。衛者言警衛之法。禁者曰關禁爲名。但敬上防非。於事尤重。故次名例之下。居諸篇之首。

諸闕入太廟門及山陵兆域門者。徒二年。闕謂不應入而入者。

疏議曰。太者大也。廟者貌也。言皇祖神主在於中。

故名太廟。山陵者。三秦記云。秦謂天子墳云山。漢云陵。亦通言山陵。言高大如山如陵。兆域門者。孝經云。卜其宅兆。既得吉兆。周兆以爲塋域。皆置宿衛防守。應入出者悉有名籍。不應入而入爲闥入。各得二年徒坐。其入太廟室。卽條無罪名。依下文廟減宮一等之例減。御在所一等。流三千里。若無故登山陵。亦同太廟室之坐。

越垣者徒三年。太社各減一等。守衛不覺。減二等。守衛謂持時專當者。

疏議曰。不從門爲越垣者。牆也。越太廟山陵垣者。各徒三年。越太社垣及闥入門。皆減太廟一等。守衛。謂軍人於太廟山陵太社。防守宿衛者。若不覺越垣及闥入。各減罪人罪二等。守衛。謂防衛士。晝夜分時專當者。非持時者。不坐。

主師又減一等。

主師謂親監當者。

疏議曰。主師。謂領兵宿衛大廟山陵太社三所者。但當檢校卽坐。不限官之高下。又減守衛人罪一等。唯坐親監當者。

故縱者各與同罪。

餘條守衛及監門各準此。

疏議曰。故縱者。謂知其不合入而聽入。或知越垣而不禁。竝與犯法者同罪。餘條守衛宮殿及諸防禁之處。皆有監門及守衛。故縱不覺。得罪各準此。

諸闌入宮門徒二年。

闌入宮城門亦同。餘條應坐者亦準此。

疏議曰。宮門皆有籍禁。不應入而入者。得徒二年。嘉德等門爲宮門。順天等門爲宮城門。闌入得罪竝同。餘條應坐者。亦準此。宮門得罪。謂越垣及防禁違式冒代之類。

殿門徒二年半。持仗者各加二等。

仗謂兵器。器杵捧之屬。餘條爾仗準此。

疏議曰。太極等門爲殿門。闌入者徒二年半。持仗各加二等。謂將兵器杵捧等闌入宮門。得徒三年。闌入殿門。得流二千里。兵器。謂弓箭刀硝之類。杵捧或鐵或木爲之。皆是。故云之屬。餘條。謂下文持仗。及至御在所者。并持仗强盜者並準此。

入上閤內者絞。

若有仗衛同闌入殿門法。其宮內諸門不立籍禁而得通內者亦準此。

疏議曰。上閤之內。謂太極殿東爲左上閤。殿西爲右上閤。其門無籍。應入者準敕引入。闌入者絞。若

有仗衛者。上閣之中不立仗衛。內坐喚仗。始有仗入。其有不應入而入者。同闌入殿門。徒二年半。持仗者流二千里。其宮內諸門。不立籍禁。謂肅章虔花等門。而得通內。而輒闌入者。並得絞罪。若有仗衛。亦同殿門法。

若持仗及至御在所者斬。迷誤者上請

疏議曰。謂持仗入上閣。及通內諸門。並不持仗而至御在所者各斬。迷誤。謂非故闌入者。上請聽敕。卽應入上閣內。但仗不入。而持寸刃入者。亦以闌入

論

疏議曰。應入上閣內者。謂奉敕喚仗。隨仗引入者。得帶刀子之屬。若仗不在內。而持寸刃入者。卽日闌入論。若非兵器。杵捧之屬。止得絞刑。持仗者斬。仗雖入。不應帶橫刀。而帶入者減二等。

疏議曰。仗雖入上閣內。不應帶橫刀。而輒帶入者。減罪二等。合徒三年。

卽闌入御膳所者流三千里。入禁苑者徒一年。

疏議曰。御膳所謂供御造食之處。其門亦禁。不應

入而入者流三千里。闌入禁苑者徒一年。禁苑謂御苑。其門有籍禁。御膳目下闌入。雖卽持仗及越垣罪亦不加。

諸闌入者。以踰闕爲限。至闕未踰者。宮門杖八十。殿門以內遞加一等。

疏議曰。闕者謂門限。闌入之人行至門限。未踰過。若至宮門得杖八十。宮內人不應入殿門。至殿門闕未踰者杖九十。殿內宿衛人至。上閣闕未踰者杖一百。

其越殿垣者絞。宮垣流三千里。皇城減官垣一等。京城又減一等。

疏議曰。越過殿垣者無問出入俱至絞刑。宮垣流三千里。皇城謂朱雀等門之垣。合徒三年。京城謂明德等門之垣。又減一等。合徒二年半。

諸於宮殿門無籍。及冒承人名而入者。以闌入論。疏議曰。應入宮殿在京諸司皆有籍。其無籍應入者。皆引入。其無籍不得入引而詐言有籍。及冒承人名而入者。宮門徒二年。殿門徒二年半。持仗者

各加二等。

守衛不知冒名情宮門杖八十殿門以內遞加一等。
疏議曰。守衛謂持時專當親主籍者。應入者唱名。
始過不知冒名情者。不識其人。無心私許。宮門杖
八十。殿門以內。遞加一等。但云不知冒情。不云不知
無籍詐入者。但冒承人名。有所憑據。人難識盡。
是故罪輕。無籍而入者。準闡入不覺故縱法。
諸宿衛者。以非應宿衛人。冒名自代。及代之者。入宮
內流三千里。殿內絞。

疏議曰。宿衛者。謂大將軍以上衛士以上。日次當
上宿衛宮殿。上番之日。皆據籍書。若以非應宿衛
人。謂非諸衛大將軍軍人以外。冒名自代。及代之
者。入宮內並流三千里。殿內並絞。

若以應宿衛人。謂已下直者

自代。及代之者。各日闡入論。

疏議曰。應宿衛人。謂諸衛所管。應入宮殿上番者。
注云。謂已下直者。未當上番人之色。自代及代之
者。彼此各日闡入罪論。闡入之罪。一准上法。

主司不覺減二等知而聽行與同罪及親監當之官

主司謂應判違
餘條主

餘條主司準此

疏議曰主司謂折衝府及諸衛判兵之官不覺人冒名自代及代之者減所犯人罪二等若知相代之情而聽行者各與同罪若冒代之事從府而來卽以府官所由爲首餘官節級爲從坐衛官不覺遞減府官一等若相冒之罪由衛卽呂衛官所由爲首餘官節級爲罪府司不坐及親監當之官者諸衛當上人兵各有本部主帥雖從別團配隸亦

是監當之限餘條主司准此者謂一部律內但言主司並不覺減二等知而聽行與同罪

諸因事得入宮殿而輒宿及容止者各減闡入二等疏議曰因事得入宮殿者謂朝參辭見迎輸造作之類不合得宿者而輒宿及容止所宿之人各減闡入罪二等在宮內徒一年殿內徒一年半

卽將領人入宮殿內有所迎輸造作門司未受文牒而聽入及人數有剩者各目闡入論至死者加役流疏議曰將領人入宮殿有所迎出有所輸送造作

謂宮內營造門司皆須得牒然後聽入。若未受文牒而輒聽入及所入人數有剩者。門司各呂闌入論。若入上閣內及御在所應至死者。門司各加役流。

將領主司知者各減闌入罪一等。入者知又減五等。不知者不坐。

疏議曰。將領主司謂領入迎輸造作。知門司未受文牒。及人數有剩。而領入者各減闌入罪一等。宮內徒一年半。殿內徒二年。入上閣內及至御在所。

流三千里。入者知又減五等。稱又者。謂減將領者罪五等。不知情入者不坐。

問曰。將領主司知者減闌入罪一等。不言不知。若有不知而領入者。合得何罪。

答曰。上條冒名相代。各以闌入罪論。主司不覺。減二等。注云。餘條主司準此。明將領主司不知。得減知情二等。上既有例。故不生文。

諸應入宮殿。未著門籍而入。雖有長籍。但當下直而輒入者。各減闌入五等。

疏議曰。應入宮殿在京諸司入宮殿者皆著門籍。若未著門籍而輒入或雖有長籍謂宿衛長上人。雖一日上兩日下皆有長籍當下之日未合入宮

殿但當下直而輒入各減闌入罪五等。

卽宿次未到而輒宿及籍在東門而從西門入者又減二等。

疏議曰。卽宿次未到者謂應供奉之官及宮官當直各有宿次其宿次未到而輒宿及籍在東門而從西門入者依令非應從正門入者各從便門著

籍假如西門有籍而從東門入或側門有籍而從正門入各減罪二等謂減闌入罪七等。

諸在宮殿內作罷而不出者宮內徒一年殿內徒二年御在所者絞關仗應出而不出者亦同

疏議曰。在宮殿內作罷者丁夫雜匠之徒作了而作應出不出者宮內徒一年殿內徒二年御在所者絞若有閹仗應出者並卽須出有不出者得罪與御在所同。

問曰。在宮殿內及御在所作罷不出律有正文。若

在上閣內不出律既無文若爲處斷

答曰上閣之內例與闢仗所同應出不出此條無文者爲上文注云闢仗應出不出與御在所同上閣內有宮人同御在所合絞御不在又無宮人減二等

不覺及迷誤者上請

疏議曰營作之所院宇或別不覺衆出或迷誤失道錯向別門非故不出皆得上請

將領主司知者與同罪不知者各減一等

關仗主司搜入不出

者各準此

疏議曰將領主司謂領入入者若知有入不出不卽言者與不出人同罪其不知有入不出者各減一等謂御所宮殿內各得減一等關仗主司謂領入搜索闢仗者其闢仗內有人不出各準將領主司之罪故云各準此

若於闢仗內誤遺兵杖者杖一百弓箭相須乃坐

疏議曰闢仗之內人皆出盡所有兵器亦不合留或有誤遺兵仗者合杖一百兵仗之法應須堪用

或遺弓無箭。或遺箭無弓。俱不得罪。故云。弓箭相須乃坐。

問云。誤遺弩弓無箭。或遺箭無弩。或有楯而無弓。各得何罪。

答云。弓箭相須乃坐。弩箭無弓。與常箭不別。有弩弓無箭。亦非兵仗之限。楯則獨得無用。亦與有弓無箭義同。

諸登高臨宮中者。徒一年。殿中。加二等。

疏議曰。宮殿之所。皆不得登高臨視。若視宮中徒

一年視殿中徒二年。

若於宮殿中行御道者。徒一年。

有橫道及門仗外越過者非

疏議曰。宮殿中當正門爲御道。人臣並不得行。其在宮殿中及宮城中。而行御道者。各徒一年。若有橫道。殿前卽有橫階。殿內亦有橫道。殿門。宮門之外。立仗之處。仗外雖無橫道。越過者亦無罪。

宮門外者。笞五十。誤者。各減二等。

疏議曰。嘉德等門爲宮門。順天等門爲宮城門。準例。宮城門有犯。與宮門同。今云宮門外者。卽順天

門外行御道者得笞五十。誤者各減二等。謂從殿中至宮門外誤行御道者各得減二等。其登高臨宮殿中有誤者亦減罪二等。

諸宿衛人被奏劾者本司先收其仗。違者徒一年。謂在宮殿中

宮殿中直者

疏議曰。宿衛人謂衛士以上諸衛大將軍目下有犯法被奏劾者。本司謂當衛主司及主帥等先收其仗。違而不收者得徒一年。本司及主帥各以所管應收仗而不收者一人得罪。謂在宮殿中當上論。

直者宮外宿不在此限。

諸應出宮殿而門籍已除輒留不出及被告劾已有公文禁止籍雖未除不得輒入宮殿犯者各以闖入論。

疏議曰。應出宮殿謂改任行使假患番下事故等。依令門籍當日卽除。門籍已除其人輒留不出。雖無假患等事及被告劾已有文牒令禁止籍雖未除皆不得輒入宮殿如有犯者各以闖入論。

諸犯闖入宮殿非御在所者各減一等。無宮人處又

減一等。入上閣內有宮人者不減。

疏議曰。諸條稱闌入宮殿得罪者。其宮殿之所御。若不在。各得減闌入罪一等。雖是宮殿。見無宮人。又得減罪一等。假若在外諸宮。有宿衛人防守而闌入。合徒一年之類。若入上閣內有宮人。雖非御在所。亦合絞。無宮人處。亦減二等。

卽雖非闌入。輒私共宮人言語。若親爲通傳書信及衣物者。絞。

疏議曰。文云雖非闌入。卽是得應入宮之人。不得

私與宮人言語。其親爲通傳書信衣物者。謂親於宮人處。領得書信衣物將出。及將外人書信衣物付與宮人訖者。並得絞坐。

諸宿衛人已配仗衛。而官司輒迴改者。杖一百。若不依職掌次第。擅配割及別驅使者。罪亦如之。

疏議曰。依式。衛士以上。應當番宿衛者。皆當衛見在長官割配於職掌之所。各依仗衛次第坐立。此卽職掌已定。若官司無故輒迴改者。合杖一百。應須迴改者不坐。若不依職掌次第。而擅配隸。乖於

式文及將別處驅使者亦各杖一百其有私使計庸重者從重論。

諸奉敕以合符夜開宮殿門符雖合不勘而開者徒三年若勘符不合而爲開者流二千里其不承敕而擅開閉者絞。

疏議曰奉敕以合符夜開宮殿門依監門式受敕人具錄須開之門並入出入帳宣敕送中書中書宣送門下其宮內諸門城門卽與見直諸衛及監門大將軍將軍中郎將郎將折衝果毅內各一人。

俱詣閣覆奏御注聽卽請合符門鑰監門官司先嚴門仗所開之門內外並立隊燃炬火對勘符合然後開之符雖合不勘而開者徒三年若勘符不合卽合執奏不奏而爲開者流二千里其不承敕而擅開閉者俱合絞罪。

若錯符錯下鍵及不由鑰而開者杖一百卽應閉忘誤不下鍵應開毀管鑰而開者徒一年。

疏議曰若錯符謂非所開閉之符及錯下鍵謂不依常法及不由鑰而開謂不用鑰而得開者此三

事各合杖一百卽應閉忘誤不下鍵及應開毀管
鍵而開者各徒一年謂牝者爲管牡者爲鍵
其皇城門減宮門一等京城門又減一等

疏議曰皇城門謂朱雀等門從合符夜開以下得
罪各減宮門一等其京城門謂明德等門亦從合
符夜開目下得罪各減皇城門一等
卽宮殿門閉訖而進鑰違遲者殿門杖一百經宿加
一等每經一宿又加一等宮門目外遞減一等其開
門出鑰遲又各遞減進鑰一等

疏議曰依監門式駕在大內宮城門及皇城門鑰
匙每去夜八刻出閉門二更二點進入京城門鑰
匙每去夜十三刻出閉門二更二點進入違此不進
是名進鑰違遲殿門杖一百經宿加一等合徒一
年每經一宿又加一等旣無罪止之文加至流三
千里宮門以外遞減一等者卽宮門及宮城門進
鑰違遲亦合杖九十經宿杖一百每經一宿又加
一等罪止徒三年皇城門杖八十罪止徒二年半
京城門杖七十罪止徒二年其開門出鑰遲者依

監門式。宮城門及皇城門四更二點出鑰開門。京城門四更一點出鑰開門。違式出鑰遲者各遞減進鑰一等。卽是殿門杖九十。宮門及宮城門杖八十。皇城門杖七十。京城門杖六十。駕在大明興慶宮及東都進請鑰匙。依式各有時刻。違者並依此科罪。

諸於宮殿門雖有籍皆不得夜出入。若夜入者以闌入論。無籍入者加二等。卽持仗入殿門者絞。夜出者杖八十。

疏議曰。於宮殿門有籍之人唯合晝日出入。若因夜開閉而輒入者以闌入論。無籍夜入者加二等。卽持仗入殿門者絞。有籍無籍等夜出宮殿門俱杖八十。

諸得出出入者。剩將人出入各以其罪罪之。被將者知情各減一等。不知情不坐。

疏議曰。謂奉敕聽出入之人。剩將人出入者各以其罪罪之。有籍者以闌入論。無籍者加二等。將出者杖八十。被將者知情謂被將之人知剩將之情。

各減前所將罪一等。不知情者不坐。

諸向宮殿內射。謂箭力所及者。

宮垣徒二年。殿垣加一等。箭入者各加一等。卽箭入上閭內者絞。御在所者斬。

疏議曰。射向宮垣得徒二年。殿垣徒二年半。箭入者宮內徒二年半。殿內徒三年。卽箭入上閭內者絞。御在所者斬。謂御在所宮殿。若非御在所。各減一等。無宮人處。又減一等。皆謂箭及宮殿垣者。若箭力應及宮殿而射不到者。從不應爲重。不應及

者不坐。

問曰。何以知是御在所宮殿。

答曰。向宮垣射得徒二年。殿垣徒二年半。準其得罪。與闕入正同。上條闕入宮殿。非御在所。各減一等。無宮人。又減一等。卽驗車駕不在。又無宮人。闕入上閭者。合徒三年。此條箭入上閭。絞。御在所。斬。得罪旣同闕入。明爲御在宮中。御若不在。皆同上條減法。箭入宮中。徒一年半。殿中徒二年。入上閭內。徒三年。

放彈及投瓦石者各減一等。

亦謂人力所及者

疏議曰。放彈及投瓦石比箭罪輕。放向宮垣徒一年半。向殿垣徒二年。入宮內徒二年。殿內徒二年半。入上閣內及御在所流二十里。是爲各減一等。亦謂人力所及者。據彈及投瓦石及宮殿方始得罪。如應及不到亦從不應爲重上減一等。

殺傷人者以故殺傷論。

疏議曰。射及放彈若投瓦石有殺傷人者以故殺傷論。殺人者斬。傷人者加鬪殺傷一等。

卽宿衛人於御在所誤拔刀子者絞。左右並立人不卽執捉者流三千里。

疏議曰。宿衛人常執兵仗得帶刀子若在御所者非敕遣用不得輒拔刀子其有誤拔者絞。左右並立人見其誤拔皆湏執捉不卽執捉者流三千里。若有別敕處分令用及仗內賜食者不坐。但舉宿衛人爲例者明。餘人在御所亦不得誤拔刀子。其有誤拔及傍人不卽執捉一準宿衛人罪。

諸車駕行衝隊者徒一年。衝三衛仗者徒二年。謂入仗隊

問者

疏議曰。車駕行幸。皆作隊仗。若有人衝入隊間者。徒一年。衝入仗間。徒二年。其仗衛主司依上例。故縱與同罪。不覺減二等。

誤者。各減二等。

疏議曰。若有人誤入隊間。得杖九十。誤入仗間。得徒一年。

若畜產唐突。守衛不備。入宮門者。杖一百。衝仗衛者。杖八十。

疏議曰。畜產唐突。謂走逸入宮門。守衛不備者。杖一百。入宮城門。罪亦同。若入殿門。律更無文。亦同宮門之坐。衝仗衛者。杖八十。仗衛者在宮殿及駕行所。得罪並同。

諸宿衛人。應上番不到。及因假而違者。一日笞四十。三日加一等。過杖一百。五日加一等。罪止徒二年。

疏議曰。宿衛人。應上番不到。及因得假而違者。一日笞四十。三日加一等。滿十九日。合杖一百。若過杖一百。五日加一等。罪止徒二年。計三十四日。

卽當罪止。

問曰。假有宿衛人。番期五日未滿。因一日假遂違不上。爲當止得四日違罪。唯復累至罪止而科。
答曰。番期有限。限內有故須請假。日滿卽須赴番。違假不上。準日科斷。其人四日之外。卽當下直。下目不勞請假。豈合計日累科。四日之外。明知不坐。又問。應上不到。因假而違者。竝罪止得徒二年。若準三十四日罪止。便是月番之外。今解下番之日不坐。恐理未盡。

答曰。依式。三衛去京二千里外。六十日上嶺南爲季上。三十四日罪止。爲包遠道生文。

故唐律疏議卷第七

故唐律疏議卷第八

衛禁 凡一十五條

諸宿衛者。兵仗不得遠身。違者杖六十。若輒離職掌加一等。別處宿者。又加一等。主帥以上。各加二等。

疏議曰。兵仗者。謂橫刀常帶其甲。稍弓箭之類。有時應執著者。並不得遠身。不應執帶者。常自近身。輒遠身者。各杖六十。其職掌之處。依次坐立。輒離職掌。加一等。合杖七十。卽於別處宿者。又加一等。合杖八十。主帥以上。各加二等。稱主帥以上。謂隊副以上。至大將軍以下。兵仗遠身。杖八十。輒離職

掌杖九十。別處宿者杖一百。是各加二等。

諸行宮外營門次營門與宮門同。內營牙帳門與殿門同。御幕門與上閣同。至御所依上條。

疏議曰。行宮謂車駕行幸及所至安置之處。外營門次營門與宮門同。闌入者得徒二年。內營牙帳門與殿門同。闌入者得徒二年半。御幕門與上閣同。闌入者絞。至御在所依上條合斬。自餘諸犯或以闌入論。及應加減者。並同正宮殿之法。

諸宮內外行夜。若有犯法。行夜主司不覺。減守衛者

罪二等。

疏議曰。宮內外行夜。竝置鋪持更。即是守衛者。又有探更行更之人。此行夜者。若當探行之處。有犯法者。行夜主司不覺。減守衛者罪二等。謂上條闌入及越垣。守衛不覺減二等。注云。守衛謂持時專當者。行夜主司不覺犯法。皆減此持時專當人罪二等。

諸本條無犯廟社及禁苑罪名者。廟減宮一等。社減廟一等。禁苑與社同。

疏議曰。闌入廟社及禁苑。本條各有罪名。其不立罪名之處。謂闌入至闕未踰。因入輒宿之類。各隨輕重。廟減宮一等。社減廟一等。禁苑與社同。卽向廟社禁苑射。及放彈投瓦石殺傷人者。各以鬪殺傷論。至死者加役流。

疏議曰。廟社及禁苑。非人射及放彈投瓦石之所。若有輒向射及放彈投瓦石殺傷人者。各依鬪殺傷人罪法。若箭傷徒二年。瞎一目徒三年之類。至死者。唯處加役流。

卽箭至隊仗若闢仗內者絞。

疏議曰。駕行皆有隊仗或闢仗而行。忽有人射箭至隊仗所。及至闢仗內者。各得絞罪。

諸於宮城門外若皇城門。守衛以非應守衛人。冒名自代及代之者。各徒一年。

疏議曰。謂宮城門外隊仗及傍城助鋪所。若朱雀等門。所有守衛之處。以非應守衛人。冒名自代及代之者。各得徒一年。

以應守衛人代者。各杖一百。京城門各減一等。

疏議曰。謂以當色下直。非當上之人自代及代之者。各杖一百。京城門各減一等者。謂明德等諸門。非應守衛人自代。從一年徒上減一等。以應守衛人自代。從一百杖上減一等。

其在諸處守當者。各又減二等。餘犯應坐者。各減宿衛罪三等。

疏議曰。其在諸處。謂非皇城京城等門。自餘內外捉道守鋪及別守當之處。相冒代者。各減京城二等。以非應守衛人自代及代之者。各杖八十。以應

守衛人自代及代之者。各杖七十。餘犯應坐者。謂
○冒代之外餘犯。或兵杖遠身。輒離職掌。及擅配割。或別驅使之類。本條應坐者。各減宿衛人罪三等。若逃走違番。不在減例。

問曰。宿衛人以非應宿衛人。冒名自代及代之者。入宮內流三千里。殿內絞。若未入宮殿事發。合得何罪。

答曰。以非應宿衛人自代。重於闖入之罪。若未至職掌之處。事發在宮殿內。止依闖入宮殿而科罪。

如未入宮門事發。律無正條。宜依不應爲重杖八十。其在宮外諸處冒代。未至職掌處。從不應爲輕笞四十。

諸越州鎮戍城及武庫垣徒一年。縣城杖九十。皆謂有門者禁

疏議曰。諸州及鎮戍之所。各自有城。若越城及武庫垣者。各合徒一年。越縣城杖九十。縱無城垣籬柵亦是。注云。皆謂有門禁者。其州鎮戍在城內安置。若不越城直越州鎮垣者。止同下文越官府廨

垣之罪。

越官府廨垣及坊市垣籬者杖七十。侵壞者亦如之。從溝瀆內出入者與越罪同。越而未過減一等。餘條未過準此。

疏議曰。官府者。百司之稱。所居之處。皆有廨垣坊市者。謂京城及諸州縣等坊市。其廨院或垣或籬。輒越過者。各杖七十。侵謂侵地壞謂壞城及廨宇垣籬。亦各同越罪。故云亦如之。餘條未過準此。

疏議曰。溝瀆者。通水之渠。從此渠而入出。亦得越罪。越而未過。或在城及垣籬上。或在溝瀆中間。未得過者。從越州城以下。各得減一等。餘條未過準此者。謂越皇城京城宮殿垣及關津應禁之處。未過者。各得減罪一等。

卽州鎮關戍城及武庫等門。應閉忘誤不下鍵。若應開毀管鍵而開者。各杖八十。

疏議曰。州鎮關戍城武庫各有禁門。應閉皆須下鍵。其忘誤不下鍵。若應開毀管鍵而開者。各得杖

八十。

錯下鍵及不由鑰而開者。杖六十。餘門各減二等。

疏議曰。錯下鍵。謂管鍵不相當者。及不由鑰而開者。謂不用鑰而開。各杖六十。餘門。謂縣及坊市之類。官有門禁者。若應閉忘誤不下鍵。應開毀管鍵而開。各杖六十。錯下鍵。及不由鑰而開。各笞四十。故云餘門各減二等。

若擅開閉者。各加越罪二等。卽城主無故開閉者。與越罪同。未得開閉者。各減已開閉一等。餘條未得開閉准此。

疏議曰。擅謂非時而開閉者。州及鎮戍武庫門而有非時擅開閉者。加越罪二等處徒二年。縣城以下擅開閉者。並加越罪二等。城主無故開閉者。謂州縣鎮戍等長官主執鑰者。不依法式開閉。與越罪同。其坊正市令。非時開閉坊市門者。亦同城主之法。州縣鎮戍城門各徒一年。自縣城以下悉與越罪同。旣云城主無故開閉。卽是有故許開。若有警急驛使及制敕事。速非時至州縣者。城主驗實亦得依法爲開。又依監門式。京城每夕分街立鋪。

持更行夜。鼓聲絕則禁人行。曉鼓聲動卽聽行。若公使齎文牒者聽。其有婚嫁亦聽。注云。須得縣牒喪病須相告赴。求訪醫藥。齎本坊文牒者亦聽。其應聽行者。竝得爲開坊市門。若有警急及收掩。雖州縣亦聽。非時而開。未得開閉者。謂未通人行者爲未開。尙得人行者爲未閉。各減已開閉一等。餘條謂宮殿門以下有門禁之類。未得開閉者。皆準此減一等。

諸私度關者。徒一年。越度者。加一等。不由門爲越

疏議曰。水陸等關兩處各有關禁。行人來往皆有公文。謂驛使驗符券。傳送據遞牒。軍防丁夫有總歷。自餘各請過所而度。若無公文。私從關門過。合徒一年。越度者。謂關不由門。津不由濟而度者。徒一年半。

已至越所而未度者。減五等。

謂已到官司應禁約之處。餘條未度準此。

疏議曰。水陸關棧兩岸皆有防禁。越度之人已至官司防禁之所。未得度者。減越度五等。合杖七十。餘條未度。準此者。謂城及垣籬緣邊關塞有禁約。

之處。已至越所而未度者。皆減已越罪五等。若越度未過者。準上條減一等之例。

卽被枉徒罪以上。抑屈不申。及使人覆訖不與理者。聽於近關州縣具狀申訴。所在官司。卽準狀申尚書省。仍遞送至京。若無徒以上罪而妄陳者。卽以其罪罪之。官司抑而不送者。減所訴之罪二等。

疏議曰。關外有人。被官司枉斷徒罪以上。其除免之罪。本坐雖不合徒。亦同徒罪之法。抑屈不申。及使人覆訖不與理者。文稱及者。使人未覆。亦聽於

近關州縣具狀申訴所在官司謂近關州縣卽準狀申尚書省仍遞送至京若勘無徒以上罪而妄訴者妄訴徒流還得徒流妄訴死罪還得死罪妄訴除免皆準比徒之法謂元無本罪而妄訴者若實有犯斷有出入而訴不平者不當此坐其應禁及散送竝依所訴之罪準令遞之若官司抑而不送者減所訴之罪二等謂枉得死罪官司不送合徒三年之類

諸不應度關而給過所

取而度者亦同

若冒名請過所而度者各徒一年

疏議曰不應度關者謂有征役番期及罪謳之類皆不合輒給過所而官司輒給及身不合度關而取過所度者若冒他人名請過所而度者合徒一年

卽以過所與人及受而度者亦準此

疏議曰以所請得過所而轉與人及受它人過所而承度者亦徒一年但律文皆云度者得徒一年明知未度者不合徒坐若關司未判過所以前準

越關未度各減五等之例。若已判過所未出關門。同未過各減一等。其與過所人既因度成罪。前人未度亦同減科。不應給過所而給者不在減例。若家人相冒杖八十。主司及關司知情各與同罪。不知情者不坐。卽將馬越度冒度。及私度者各減入二等。餘畜又減二等。家畜相冒者不坐

疏議曰。家人不限良賤。但一家之人相冒而度者杖八十。旣無名字被冒名者無罪。若冒度私度越度。事由家長處分。家長雖不行。亦獨坐家長。此是

家人共犯止坐尊長之例。主司謂給過所曹司。及關司知冒度之情。各同度人之罪。不知冒情。主司及關司俱不坐。將馬越度冒度私度各減入二等。若越度杖一百。冒度私度杖九十。餘畜又減二等者除馬之外。應請過所者並爲餘畜。越度杖八十。私度冒度杖七十。其家畜相冒者。謂毛色齒歲不同相冒竝不得罪。

諸關津度人無故留難者一日。主司笞四十。一日加一等。罪止杖一百。

疏議曰。關謂判過所之處。津直度人。不判過所者。依令。各依先後而度。無故留難不度者。一日主司笞四十。主司謂關津之司。一日加一等。七日罪止杖一百。此謂非公使之人。若軍務急速而留難不度。致稽廢者。自從所稽廢重論。

諸私度。有佗罪重者。主司知情。以重者論。不知情者。依常律。

疏議曰。私度者。謂無過所從關門私度。止徒一年。或有避死罪逃亡。別犯徒以上罪。是名有它罪重。

關司知情者。以故縱罪論。各得所度人重罪。不知情者。依常律。謂不知罪人別犯之情者。依常律不覺。故縱之法。

諸領人兵度關。而別人妄隨度者。將領主司以關司論。關司不覺。減將領者罪一等。知情者各依故縱法。有過所者。關司自依常律。將領主司知情。減關司故縱罪一等。不知情者不坐。

疏議曰。準令。兵馬出關者。依本司連寫敕符勘度。入關者據部領兵將文帳檢入。而別有人妄隨度。

者罪在領兵官司故云將領主司以關司論知情與同罪不覺減二等若知別有重罪亦依重罪科之關司不覺者謂關司承將領者文簿不覺別人隨度者減將領者罪一等謂減度者罪三等知情者各依故縱法稱各者將領主司及關司俱得度人之罪有過所者關司判度自依常律不減將領主司之罪若將領主司知情減關司故縱罪一等不知情者不坐

諸齎禁物私度關者坐贓論贓輕者從私造私有法

疏議曰禁物者謂禁兵器及諸禁物並私家不應有者私將度關各計贓數從坐贓科罪十匹徒一年十匹加一等罪止徒三年準贓輕者從私造私有法擅興律私有甲一領弩三張流二千里稍一張徒一年半私造者各加一等假令私將稍度關平贓直絹三十五匹卽從坐贓科徒二年不計稍爲罪將甲一領度關從私有法流三千里卽不計贓而斷

若私家之物禁約不合度關而私度者減三等

疏議曰。依關市令。錦綾羅縠紬緜絹絲布。旄牛尾。真珠金銀鐵。並不得度。西邊北邊諸關。及至緣邊諸州興易。從錦綾以下。並是私家應有。若將度西邊北邊諸關。計贓減坐贓罪三等。其私家不應有。雖未度關亦沒官。私家應有之物。禁約不合度關以下。過所關司捉獲者。其物沒官。若已度關及越度被人糺獲。三分其物。二分賞捉人。一分入官。諸越度緣邊關塞者。徒二年。共化外人私相交易。若取與者一尺。徒二年半。三匹加一等。十五匹加役流。

疏議曰。緣邊關塞。以隔華夷。其有越度。此關塞者。得徒二年。以馬越度。準上條減入二等。合徒一年。餘畜又減二等。杖九十。但以緣邊關塞越罪故重。若從關門私度人畜。各與餘關罪同。若共化外蕃人私相交易。謂市買博易。或取蕃人之物。及將物與蕃人。計贓一尺。徒二年半。三匹加一等。十五匹加役流。

私與禁兵器者。絞。共爲婚姻者。流二千里。未入未成者。各減三等。卽因使私有交易者。準盜論。

疏議曰越度緣邊關塞將禁兵器私與化外人者絞。共爲婚姻者流二千里其化外人越度入境與化內交易得罪並與化內人越度交易同仍奏聽敕出入國境非公使者不合故但云越度不言私度若私度交易得罪皆同未入者謂禁兵器未入減死二等得徒二年半未成者謂婚姻未成減流三等得徒二年因使者謂因公使入蕃蕃人因使入國私有交易者謂市買博易各計贓準盜論罪止流三千里若私與禁兵器及爲婚姻律無別文。

得罪並同越度私與禁兵器共爲婚姻之罪又準別格諸蕃人所娶得漢嬪女爲妻妾並不得將還蕃內又準主客式蕃客入朝於在路不得與客交雜亦不得令客與人言語州縣官人若無事亦不得與客相見卽是國內官人百姓不得與客交關私作婚姻同上法如是蕃人入朝聽住之者得娶妻妾若將還蕃內以違敕科之。

諸緣邊城戍有外姦內入謂非衆成師旅者內姦外出而候望者不覺徒一年半主司徒一年謂內

外姦人出入之路。關於候望者。

疏議曰。國境緣邊皆有城戍。式遏寇虐。預備不虞。其有外姦內入。謂蕃人爲姦。或行間諜之類。注云。謂非衆成師旅者。依周禮五百人爲旅。二千五百人爲師。此謂小小姦寇抄掠者。若成師旅自依擅興律。連接寇賊。被遣斥候。不覺賊來。徒三年。有內姦外出者。謂國內人爲姦。出向化外。或荒海之畔。幽險之中。候望之人。不覺有姦入出。合徒一年半。雖非候望者。但是城戍主司不覺得。徒一年。謂內

外姦人出入之路。關於候望者目所堪見爲關。謂在候望之內也。

其有姦人出入。力所不敵者。傳告比近城戍。若不速告。及告而稽留。不卽共捕。致失姦寇者。罪亦如之。

疏議曰。其有姦人出入。所經城戍。皆卽捕之。若力所不敵者。卽須傳告比近城戍。令共捕逐。若不速告。及告而稽留。不卽共捕。致失姦寇者。並徒一年。諸烽候不警。令寇賊犯邊。及應舉烽燧而不舉。應放多烽而放少烽者。各徒三年。

疏議曰。烽候謂從緣邊置烽連於京邑。烽燧相應。以備非常。放烽多少。具在別式。候望不舉。是名不警。若令蕃寇犯塞。外賊入邊。及應舉烽燧而不舉。應放多烽而放少烽者。各徒三年。

若放烽已訖。而前烽不舉。不卽往告者。罪亦如之。以故陷敗戶口軍人城戍者。絞。

疏議曰。依職方式。放烽訖而前烽不舉者。卽差脚力往告之。不卽告者。亦徒三年。故云亦如之。以故陷敗。謂從烽候不警。及應舉烽燧而不舉。或應放

多烽而放少烽。或放烽訖而前烽不舉。不卽往告等。以故陷敗戶口。或是軍人及城戍者。各得絞罪。卽不應舉烽燧而舉。若應放少烽而放多烽。及違烽二里內。輒放煙火者。各徒一年。

疏議曰。依式。望見煙塵。卽舉烽燧。若無事故。是不應舉。若應放少烽而放多烽。及違烽二里內。皆不得有煙火。謂晝放煙夜放火者。自不應舉烽燧而舉。以下三事。各徒一年。放烽多少。具在式文。其事隱秘。不可具引。如有犯者。臨時據式科斷。

故唐律疏議卷第八

